

Uno niue que li pastre avien mes si mantèu
 E s'èron acala pèr garda lou troupèu,
 Veguèron uno clarta devers la Mountagneto
 E un cant misterious venguè de l'oulivetò.
 « Es l'ange boufarèu que vèn vous anouncia
 Qu'amount, à Betelèn, lou fiéu de Diéu es na
 Dins lou founs d'un estable ; l'ase emé lou biòu
 Boufon sus si dous pèd. Coume noun a de linçòu,
 E que tambèn fai fre sus la paio de blad,
 Se voudrias ié pourta la lano dóu flouca,
 Soun cors sarié bèn caud acata dins sa brèssò.
 Anas, e Diéu vous garde dins aquéu jour d'alegrosso ».
 Alor, tout à-n-un cop dóu founs de l'ourizount
 Sourgiguè un fanau, pièi dous, pièi un mouloun.
 Courniho lou móunié e soun sa de farino,
 Lou ravi, lou bóumian, lou pescaire à la ligno.
 L'amoulaire tambèn, a davala sa molo ;
 E pièi veici veni li jougaire de violò.
 Tóuti amoulouna disien : « Coume anan faire
 Se nous fau camina ? » quand lou tambourinaire
 Sourtiguè soun flutet e diguè : « Bràvi gènt
 Escoutas ma musico, e pièi pèr Betelèn,
 En vous baiant la man, partès en farandoulo
 Pèr pourgi au pichot un brèu de farigoulo ».
 Tres o quatre entrechau, arrivon à la jasso,
 Chascun a soun presènt, un pan, uno fougasso.
 Mai Jèsus dins la grùpi levè sis pichot bras
 Quand veguè sus la porto arriva lou flouca
 Escourta de dous pastre que pourtavon l'agnèu ;
 E marcavon tant bèn souto si grand mantèu
 Que Jousè s'avancè e ié prenguè li man...
 Mario èro en estàsi i pèd de soun enfant,
 Sounjavo i bràvi gènt que venien en abounde
 Pèr adoura soun fiéu que deù sauva lou mounde.

Jan DUCHÉ
 (Li Cant de ma Terro)

